

四庫全書

集部

欽定四庫全書

集部

學餘堂詩集卷十

五至八

詳校官檢討臣劉錫五

助教臣常循覆勘

總校官庶吉士臣何思鈞

校對官檢討臣蕭九成

謄錄監生臣張昱

欽定四庫全書

學餘堂詩集卷十五

翰林院侍讀施閏章撰

七言古

古硯篇

江城井底收鐵片土花瑟瑟龍文纏排沙刮垢重摩挹  
何代沉淪古石硯生稜折盡半刊殘平處精瑩照人面  
光寒質重不時宜市兒皮相疇稱善永興紹興篆模糊

龍圖二字差隱見古來著書經幾人還逃劫火經百戰  
當年珍重等天球今日塵封壓書卷於乎古道今獨難  
隋珠燕石誰能辨端州舊貢官禁嚴老阮尺寸人爭羨  
亂來萬事無留餘江根石窟搜羅徧眉子金星歛轉無  
馬肝鸛眼端齟賤誰知古物存典刑閱盡人間陵谷變  
請君拂拭作鴻寶明堂禁苑猶堪薦於乎縱使不用沉  
埋且阮塹毋使健兒橫取磨刀劍

桐窗篇

籜龍繞屋紛無數手植窗前碧桐樹夕陽不下好風來  
清光直與相朝暮主人夜半還讀書窗櫺髣髴誰嘯呼  
桐君何處回仙馭昔桐廬一峯有異人采藥問其姓名指桐以對因名桐君山阿閣  
將無來鳳雛嶧陽孤桐已枯死島嶼茫茫餘海水他年  
見取作琴瑟會看一洗巴人耳

杜拾遺戴笠圖歌

趙子昂畫劉公崧解公緡題時稱三絕

杜老既往垂千祀杜老軒然生在此何不貌公簪紱時  
短衣戴笠荒山裏丹青巨手趙吳興白描眉骨隱鋒稜

丈夫失路多慷慨憂時萬事悲填膺西江槎翁題短句

錦袍仙客知相慕

劉詩有為報西流夜郎  
容錦袍霜冷更相思

驚呼復有解

學士縱筆揮毫不得住其詩風雨發春葩書工行草無

欹斜乃知前輩不鹵莽俗傳解筆空如麻是時四坐皆

嘉客聳肩咋舌稱三絕周郎乞取摹粉本

周伯衡命  
工臨摹

謂

與此老尤親切嗟公自負比稷契誰令公不久朝列拾

遺朝拜夕批鱗依舊麻鞋甘百折棄官拾耜走飢寒長

饒同谷歌幽咽人間滿眼皆公卿高冠大帶誰寫生飯

穎山頭一野老千秋遺像猶崢嶸請看巴蜀山川百戰  
改浣花草堂至今在

柏山祠堂行

梅聖俞先生祠一名雙羊山梅  
詩有風雪雙羊道梅花溪上村

都官昔詠雙羊道雙羊滅沒餘春草老梅折盡古亭廢  
公詩與日同杲杲豐碑在墓祠在山峻宇飛甍入蒼昊  
嗟公以詩冠有宋自許言皆婉雅頌希聲古調知者誰  
推倒歐陽天下重載酒過門多讌游謀篇課日爭傳誦  
先生史學羅丘墳春華末技等浮雲毛詩小傳唐載記

事見宋史

千秋述作何殷勤上書未成館閣用落筆能令荒  
齋聞蠶布弓衣亦偶爾天將公張宛陵軍於乎先生不  
可作幾樹梅花自開落流風後起盛於斯眼前若箇鳴  
當時酹公酒侑公歌鼓坎坎舞傿傿公歸弭節飲且酌  
宛溪如帶江離多

田家歌

雨後平蕪碧玉盤青青禾黍露華溥烟開日射東山見  
芙蓉秀出層雲端得水山田稻花好綠蓑老翁含笑看



自言昨日府吏至賣絲已了官家事身無餘帛倉有粟  
妻兒忍凍意亦足

春風舞歌

何淡玉武陵伎也嘗作歌曰春風舞春風舞吳姬紫  
玉飛作烟越艷西施化為土既早死又數憑箕有亡  
年纔十八死托杜鵑根之句吳門尤展成紀以長歌  
屬和仍目篇曰春風舞

春風舞春風舞風舞花飛落何所昔為掌上身今作泉

下土月明環珮魂啾啾猶寄人間斷腸語自言死托杜  
鵲根三生艷質纏辛苦悲歌促節有遺音珊瑚碎折西  
陵浦君不見廣陵十萬女如雲一朝零落同秋雨江南  
薊北天茫茫夢回寧識吹簫侶但使春心吹不斷年年  
化作春風舞

春日陌頭歌

垓下重瞳泣數行沛宮隆準亦霑裳英雄哀樂各有淚  
眼中四坐皆北邙我欲竟此曲此曲斷人腸請君浮綠

醕歌白紵明眸翠袖仙仙舞棄捐陳跡何足數生不願  
封萬戶侯但願歲歲春三月看花十日無風雨

玉山新筍歌

宋梅尚書詢讀書山寺嘗乘銀鞍  
馬聖俞詩當年吾叔讀書處即此

雙溪雲漲玉山頭幽篁礙日陰風秋山靈夜召雨師集  
驚起蒼蚪倚天立開嵯裂石排崆峒紫鱗散落飛雲中  
青冥復起丰林霧銳戟長矛森武庫瞳瞳日射光氣殊  
又疑海底生珊瑚騫騰作勢何夭矯纔迸牆根出樹杪  
野老山僧驚歎息干霄會見千尋直噴薄雖兼雷雨功

扶搖豈恃風雲力當年跨馬中林來尚書都官吟幾回  
文采風流今未歇青山歲歲春花開我愛此君不能去  
他日重尋讀書處

夢殺虎

草堂半醉孤眠客恍惚南山飛白額前有絕壁後懸崖  
哮鬪馮陵爭咫尺攘臂不知身是誰抨弓一發洞虎腋  
啾啾俵鬼哭寒月砉然一聲駭魂魄東海黃公術不行  
山君山君來縱橫舊劍如何心未死曉來壁上雷聲起

宿燕子磯

石燕孤飛落沙渚  
陵波奮翼空中舉  
年年江樹舞春風  
日日山雲含暮雨  
片帆夜泊臨磯宿  
浪打輕舟眠不熟  
三更月出海門東  
一聲清嘯聞漁翁

敬亭山贈別錢聖月時余將適吳門

敬亭之山高嵯峨危巖古木蒙烟蘿  
錦袍仙客來經過  
若有人兮山之阿  
雲車羽裳響玉珂  
月明猶聽空中歌  
酌君斗酒顏未酡  
振衣上與蒼天摩  
纍纍列岫青如螺

坐中雅咏陽春和飛來白鶴舞婆娑君今小憩陵陽坡  
來朝我逐吳江波眼看楓葉落漁蓑回首寒山柰別何

燈船行

秦淮五日歌聲出簫鼓樓船風雨疾少年結伴橫飛揚  
舟尾相銜不相失朱樓兩岼盡鉤簾皓齒蛾眉嬌綺筵  
樓上舟中爭注目緩楫停橈垂柳邊須臾日落華燈起  
羅列星辰畫船裏風回電掣天地翻照徹魚龍動江底  
可憐舊俗弔三閭歌舞喧闐送夜徂不知今夜秦淮水

還記繁華六代無

長安狹邪行

長安城中多狹邪，千樹萬樹桃李花。  
花間半住青樓女，門外爭過白鼻騮。  
朝朝遠逐繁華子，學弄琵琶惜纖指。  
借問君家舊阿誰，低頭淚落金樽裏。  
妾家江南全盛時，花谿畫閣香風吹。  
牙籤幼讀班姬誡，彤管嬌吟左女詩。  
阿母憐兒愁遠嫁，比舍崔盧結姻婭。  
弱體難勝羅綺衣，羞人不上鞦韆架。  
爭誇十五正盈盈，一夜江城滿甲兵。

雨淚駝來細馬上蛾眉早籍教坊名青袍白馬多南客  
但聽鄉音暗嗚咽田園骨肉今有無身辱何人惜離別  
侯王列第喧笙竽霓裳翠袖舞瓊瑜分絕將軍沙叱利  
生憎倚勢霍家奴御溝歲歲春風起燕子雙雙尋故壘  
心摧腸斷為誰懽悔別家鄉身不死坐中歎息愁四筵  
誰將紅粉換金錢押衙不見傾城老芳草長悲薊北天

天妃閘歌

在清河縣為諸  
閘險峻之首

黃河怒流動地軸十舟九舟愁翻覆臨磯作閘為通舟



水急還憂石相觸挽舟泝浪似升天千夫力盡舟不前  
巫師跳叫作神語舟人膽落輸金錢梨園唱盡迎神曲  
猶殺牛羊啖水族不爾作難在須臾鯨鯢張口待人肉  
嗟爾運漕於國為咽喉粟米力役家家愁願持尺牒問  
陽侯

聖主勞兮瓠子塞河兮河兮當努力

泗上行

颯颯石尤風暮送黃河雨雨來急如箭掩口不得語眼

看村市飛沙鷗家家屋裏垂釣鉤水深岨沒濶如海惟  
見青青高樹頭問君桑田何日改南畝西疇復安在老  
人歎息涕沾襦仰天頓足啼且呼去年久旱千里赤賊  
騎衝突無朝夕今年滿地皆橫流馬蹄暫免蹂荒丘為  
乾為濕總無食賊去還愁官騎逼縣官不敢晝開城大  
戶朱門皆堵塞我行過此心忡忡蕭條滿目聞哀鴻水  
能歸壑人歸農

登超然臺

諸城縣上有  
東坡先生像

昔讀東坡記夢憩超然臺夢中靈蹟多滅沒乘風惆恍  
心裊裊豈知躡屐十年後故人天末同銜杯曉烟漠漠  
天欲雨城頭秀色為余開浮雲一洗萬峰出縹緲如鳬  
海上来俯看苑囿雜丘壑欲尋杞菊穿蒿萊風流太守  
丹青在掀髯極目真悠哉逍遙之遊亦如此何必求仙  
去不回君不見秦皇空戀瑯琊臺斷碑剝落成飛埃千  
秋輦道埋荒苔

過皖城張有方同年餉鱖鮓六器

雪花鱸膾餐不足錯落燕脂染寒玉琉璃餅貯暗生香  
開筵為勸杯中醪此去三江自有魚難將雙鯉報君書  
扁舟載得故鄉味嘗遍江魚不如

蘄州元夕傷亂後無燈火

終年在家鬱不樂昨日出門客愁作觀燈擊鼓楚江頭  
白骨青燐雙淚流長天漠漠山我我人生涕淚為誰多  
自恨有心髮易白振衣再拜江邊石

岳陽行

岳陽城中虎畫伏黃昏破壁擇人肉張弧射十不中一  
寡婦蒙頭中夜哭我來風迅難停舟留連獨為岳陽樓  
登樓四顧失天地巴陵直欲西南浮茅屋新成數十間  
孤城蕩蕩如空山洞庭白日沉烟霧一葉扁舟從此去

野店篇

祁陽山中斷行旅萬嶺參天天欲雨松杉百里一茅店  
椎髻老翁作蠻語土垣半倒撐樹枝白日空庭走飢鼠  
驚看上客車馬多却立低頭色如土連年此地莽丘墟

行人露宿飼豺虎生兒箐中已八歲不識門前樹禾黍  
官來給種新買犢臥無莞簟炊無釜遺黎擊柝夜燔薪  
防虎中宵有伏弩客聞歎息亦吞聲亂後天南鮮安堵  
吾語老翁汝勿苦日暮壺漿不索汝過吏遊兵慎莫嗔  
主人去此適他所

水井行

蒼梧水井著自元次山施子同藥公就而酌之求次  
山漫泉銘不可得作水井行

鬱蒸炎海思飲水物色寒泉隨老僧挈餅拂磴穿蒼藤  
水何窅窅山稜稜一泉下從石底出靈壑玄雲交白日  
衆山倒景色澄泓萬木凝霜氣蕭瑟淒神竦骨如龍湫  
一飲能令消渴瘳山靈瓊液自珍惜秘之不肯通江流  
次山斟酌已千載鴻濛再闢吾儕在屈蠖神龍濁水遊  
百尺清心同不改於乎此泉清且仁活我萬里憔悴之  
勞臣不然三江流盡萬山毒勺水入口能殺人南有火  
山北水井造物位置良苦辛於乎此泉清且仁安得挹

取百甕長隨身

昭江黃牛灘得黃抑公同年書

抑公拜廣西太平守地鄰交趾居無解出無興寄食  
軍中若逋客然施子聞而悲之

黃牛灘前風色惡怪石峻嶒森劒鏑平頭致我尺一書  
十年枯淚千行落天南瘴癘多故人屈指黃生最苦辛  
一官三載無處所寄食羈縻似逐臣瓠陽衽席連交趾  
日夕豺狼礪其齒甌塵不敢留僮僕路斷無由訣妻子



平生卓犖黃大夫，跼蹐甘為轅下駒。  
低頭側足幕中趨，悔不早讀黃石書。  
安知虎頭燕頤非吾徒。

廣州寄博羅令馮歉然

前年走馬長安道，燕趙風流君自好。  
彈箏擊劍悲且歌，相看意氣非草草。  
別來歲月如飄塵，天南塞北車轡轉。  
分符君作羅浮長，叱馭余為嶺外人。  
羅浮山色自堪誇，回首風烟莫憶家。  
蓬轉自憐無定跡，祇懷潘令縣中花。

廬山遇雨

山下自晴山上雨林深苔滑流石乳杖藜撥雲雲不開  
洞口老猿作人語忽聞天際一鐘鳴隔水蒼茫尋磴戶

玉川門歌

老蛟昨夜崖前吼百泉迸出雷霆走玉川雨後多白雲  
片片從風飛戶牖攀蘿捫葛石崔嵬鐵壁千尋掌上開  
因巖結屋誰能住好跨青牛歸去來

水西行

水西寺為黃蘗道場嘗致碧雞玄虎又傳唐宣宗龍

潛處李太白數嘗遊詠甲午春吾宗學博元引觴予  
其上故人程翼蒼庶常在焉坐俯芳洲桃花萬樹飲  
酣二君舉杯屬曰此山以太白名今復有尚白其可  
無以示來者乃作歌留寺壁去

我來涇谿一月住風雨不識水西路乍晴鼓枻逐輕鷗  
山寺谿光雜烟霧此地當年帝子宮層巖古木紛龍從  
靈錫飛來黃檗住春風吹徧桃花紅桃花落盡芝草長  
碧雞晝叫空山響萬家烟火遠參差一葉漁舸自來往

乍看疑是輞川遊重憶瀟湘杜若洲釣魚臺下浮青玉

秋霜閣畔思貂裘

有劉遺民釣臺太白詩五月思貂裘

白也詩無敵遂使

山川破岑寂我亦能清歌復留數字鐫絕壁五松院三生石安知今日後遊人不是當年舊李白

石照山

續漢

華陽古洞何熒熒皎如白日出杳冥問誰鼓鑄五丁手

直剖秦銅懸翠屏客照清光四座滿雲開倒影羣峯青

劫火燎原燒不得

志稱黃巢照見猿形縱火焚之

山精木客皆潛形滴

溜幽崖響寒玉乳泉瀉出如中泠試采菖蒲吸泉水昨日自醉今日醒世人白眼不可向此中臥讀黃庭經

桃花洞遇紫虛道人狀甚異作詩與之

道人不識字信口是丹書十年高臥終南隅忽騎竹杖

來天都袒臂散髮貌若愚手中日月雙明珠

掌中有光如珠

左

目重瞳光曜殊獨持麈尾畫空虛邈邈仙歸無與俱

先是

有道人名邈邈仙蛻骨石洞中今畧以塔即紫虛坐臥處

一燈一榻君為徒道人見

客何為乎看山導我凌崎嶇坐攀五老狎三姑倒捫星

辰天可呼但使吾儕沐浴入玉壺回首人間一事無壺  
中自長青芙蓉

胡將軍射雙虎歌

歛城西二虎排闥啞人獵者不能捕將軍怒馬一出  
得之啖予虎炙醉為之歌

將軍世胄冠三秦身經百戰開風塵力排華嶽今不用  
挂劒弋戈勇且仁馬頭忽聽河西哭山君咆哮出山腹  
將軍怒掣金僕姑笑看白額如黃犢伏者為雌騰者雄

陰風獵獵青林中，雕弧五石洞雙腋。  
霹靂一響羣山空，須臾叱咤取虎炙。  
折柬還招長揖客，匕首縱橫似逐鹿。  
冰盤玉笋何狼籍，胡將軍君不聞李廣射石揚英聲。  
孝侯殪虎成令名，不若雙擒破虎穴。  
天都賴爾為長城，明朝振策攀黃岳。  
許我披榛放膽行。

新橋飯魚行

溪南之水清且駛，魚遊在空中。  
不在水，朝朝得食魚自馴。  
索鋪昂首向遊人，小魚煦沫沾餘粒。  
大魚鼓浪吞併急。

赤鯉從中飛且高風雷隱隱翻洪濤乍如五陵年少行  
探丸躍馬相縱橫又若秦漢戰鉅鹿揚沙走石翻地軸  
須臾食盡還悠悠一游一泳空潭綠是時兩岬桃花放  
羅綺香風生錦浪珊瑚鞭折寶釵墮千人注目心駘蕩  
魚既樂兮我欲歌畧師眼熱當奈何嗟彼枯魚過河泣  
向來貪餌亦無多

再遊寶相寺燒筍歌

泉涌出石底  
名沸沙泉

問政山中雲滿衣叢筍曲處開僧扉問政山中筍如斗



長鑣劖得不能剖旋解紫茸煨白玉斜日穿林火候足  
同游恰有兩三人興酣吞却千竿竹重來祇樹開芳筵  
新茶初試沸沙泉籜龍半吐半屈蠓香膩彌甘過雨天  
草閣數椽碧靄聚松濤萬壑春風顛春風顛我欲眠前  
日花紅今樹綠憑闌注目心茫然

老女行

并序

傷女奴也海陽俗用女奴樵汲或終老不字覽長門  
寡婦二賦愍焉茲又殆甚敢告主人年二十以上俾

為嬾怨庶可已作老女行

老女髮黃赤雙腳敝襦掩淚千行落風昔紅顏不嫁人  
今朝衰髻將誰託憶渠三五如春花道菊見者為咨嗟  
木有連枝鳥有匹女兒那得長無家杏花月楊柳春使  
我上山行負新豺狼厲齒為我鄰暮歸不敢言苦辛宴  
高堂舞霓裳梁間燕子飛雙雙主人歡樂夜未央我獨  
何辜宿空房君不見蕩子婦望遠未歸悲獨處老女吞  
聲更誰語

王郎行酬王梅士并簡諸子

汪文岫吳右丹饒景玉江懋昭漢石尚一

杜陵醉後歌王郎拔劍斫地何激昂千年相望有我輩  
短歌一曲為君長君勿言窮愁著書老君勿羨游俠少  
年場丈夫磊塊少知己揮毫白眼看扶桑黃山三十六  
峰峰秀絕倒挂青霞吐日月五月六月百花開紛紅駢  
綠無時歇王郎直入烟嵐窟飽餐石髓脫凡骨驚魂濯  
魄清思發片言隻語皆突兀我從敬亭來却望黃山空  
裊裊軒轅拍手向我笑爾自齷齪非仙才眼前幸有二

三子握手傾尊懷  
抱開汪子典刑老  
無敵吳子秀逸清  
塵埃饒子手口盡  
丘壑江子兄弟森  
風雷王郎屢空倍  
憔悴素心相視無  
嫌猜我歌王郎行  
王郎歌莫哀要使  
黃山倒墜作平地  
吾儕不朽留姓字

憶昔行寄宋荔裳隴西

并序

辛卯冬于役西粵  
宋員外琬坐繫泣  
贈長歌呼予謝  
宣城時同門尹使  
君明廷守昭州故  
與宋善詩中兼  
及之及粵西亂後  
予歸居先王母憂  
宋已脫難遷吏

部尚書郎緘書相慰勞而昭州計至未幾宋又出備  
兵隴西三年之間忘形故人生死離合四顧潜然追  
憶往事作是詩

雕蟲滿眼何紛紛安得麟鳳開其羣騷之苗裔今宋玉  
風流儒雅揚清芬宣城後身吾豈敢文章膠漆良殷勤  
憶昔西曹別離苦倉皇不盡臨岐語北辰南極阻且長  
一曲驪歌淚如雨蝮蛇遊處鷓鴣啼山魈一脚向人舞  
傷心瘴癘復烽烟徒跣中宵避豺虎聞君騰踏黃金臺

離愁卞破懽顏開隴頭流水忽鳴咽西方千騎遠衰裊  
李密回車淚空盡昭州斷魂招不來願逐西風墮兩側  
彈箏夜醉葡萄杯黃花白露風淒淒拂塵開篋把君詩  
宵冥風雨鬼神泣竄窳山林猿鶴悲我有一幅水蠶絲  
裁成綺服遺阿誰天寒河凍關塞遠腸斷思君知不知  
雪夜簡邢孟貞

謝眺樓前雪盈尺江城夜半山窗白闕心最是白頭翁  
伏枕呻吟長作客故園生計在漁樵干戈萬事成飄搖

釣竿空把湖邊月詩卷愁隨水上瓢寄書白門凡幾度  
十年重踏雙橋路可堪我病君復爾臥擁寒衾送朝暮  
人生聚散如飛蓬今宵相對一燈紅明日湖舟冰雪裏  
愁聽鴻鵠號悲風

南華山房歌贈張登子

越中山水秀天下君家山水越中無結廬已占臥龍麓  
別業重開賀監湖湖邊繫艇卽園子百年三徑未荒蕪  
草堂位置隨丘壑閉門空翠生肌膚新荷綠浦鳬鷺亂

古木層巖麋鹿趨主人交盡天下士坐客半是高陽徒  
袒裼竹林浮大白茶烹蘭雪炊雕胡我飲既醉不能去  
欲眠不眠倚桐樹擊鉢催詩酒政嚴墨痕滿壁紛無數  
檻外魚龍風浪生杳靄藤蘿鬼神聚自是君家多異書  
禹穴金庭何足慕明朝更作天鏡遊扶筇踏盡山陰路

書太守錢侯傳後

并序

四明錢侯孝直嘗守寧國識閨章童子試中目  
以國士侯去五載胄子聖月過宛陵述侯少壯



時有抗疏辯寃贖父出獄一事使予淚泫泫下  
紀以短歌

錢侯昔守宛陵郡簪纓不改烟蘿性去住總無赫赫名  
悠游萬戶載清淨網羅才彥罕留良憐予下士收門牆  
側聞平昔著奇節至孝激烈凌風霜為痛父寃不得白  
身櫻虎豹號天闕灑血直使鬼神驚遂使囹圄覩日月  
念茲一事垂千年何須政績耀簡編況復宦成甫中歲  
臥龍抗志歸林泉於乎余父早歿叔舍寃實恥自訟耽

灌園當塗棄斥何足憾  
白壁蒙塵不可言  
我欲碎首呼蒼天  
覆盆抑鬱向誰宣  
自傷不若錢侯賢  
躑躅吞聲徒涕漣

學餘堂詩集卷十五

欽定四庫全書

學餘堂詩集卷十六

翰林院侍讀施閏章撰

七言古

青藤引

青藤書屋徐文長讀書處藤大如斗徐自稱青藤道人後為陳章侯宅今陳歿數年而青藤為風雷所壞感而賦之

青藤青藤爾生幾百載幾見桑田與滄海霜根拔地石  
谿斫翠葉垂天雲靉靆下根伏積雪上幹棲真宰小山  
叢桂不敢望若木扶桑勢相抗葛陂仙叟騎作龍襄陽  
老顛拜為大千年盤鬱精靈開腹空火起轟奔雷嵯峨  
石柱倒燦爛金臺摧豐隆行歎息屏翳坐裊裊嗟爾青  
藤胡為乎顧哉昔日天池讀書處狂歌大叫倚藤樹又  
聞丹青老蓮子

陳章侯自  
號老蓮

解衣醉卧呼不起蘭亭客散

纏荆榛風吟雨嘯空悲辛自古才人所託迹會能白日

生霹靂青藤青藤我欲南登石梁遊金庭策爾為杖兮  
爾騫騰

象山謠

懷同年顧  
雙九也

象山令居東海中往來飄忽隨天風夜見魚眼波濤紅  
捨舟登岫豺虎窟伏莽健兒復馳突夾路杈枒堆白骨  
城中罷市無居民秣馬無粟豐無薪冠蓋使者坐生嗔  
為語象山令請君勿太息昔何白哲今黧黑挂冠高枕  
何可得

怪風行

海州白晝黃塵昏烈風倒海搖山根城崩一角塞城門  
兒童大叫相追奔有客擁衾臥高閣屋瓦翻飛如卷簾  
驚禽駭獸無處所黃輿欲裂蒼穹薄海濱自昔多颶風  
父老祇今皆錯愕孤城屢破血痕腥風鶴喧呼猶膽落  
天豈驅除此子遺茫茫吹盡成廣漠風伯飛廉有倦時  
願君返轡收靈旗高山大壑無轉移於乎四海十年甲  
兵不得息風塵瀕洞何終極

海東謠

海東旱三年矣施子過之減騶併食歌促急不成聲  
竊比於海人之謠云爾

海中陰火燒扶桑車魚骨擊為梁截骨為臼春無糧  
囑兒忍飢勿夜哭牆頭跳叫多豺狼

二

場丁醜賈無完屋一握黃梁鹽十斛差科絡繹相驅逐  
前日路死骨未收且緩須臾莫鞭扑

三

黃蒿颯颯風啾啾遺黎眼枯無淚流賣男得錢新買牛  
墾荒給種聖人出何時親幸海東頭

太函山房歌寄汪文岫

是司馬伯玉先生孫

司馬文章射雕手武庫森森無不有左拍歷下右婁東  
奇書萬卷皆蚪蚪騰驤後勁有聞孫墨汁沉酣作杯酒  
生事終年寄嘯歌杖藜十載慵趨走山堂舊業大如拳  
怪石幽花羅戶牖前坡隙地盡栽茶後圃高墉密挿柳



客來開甕酌流霞燒筍烹葵意良厚別君牢落歛三春

好事狂吟無恙否練水華屏

歙縣二地名

魂夢飛蓮華黃海

招邀久送酒王弘既拂衣遊山謝客空回首狂夫青眼

向烟霞肯與侏儒較升斗他年同上軒轅臺

黃山有軒轅臺

好

揖浮丘作老友

### 梅母歌

東溪水清淺水流石不轉石邊冬青樹霜落青如故冬  
青樹高母手栽扶疎百尺清風來莫言黃鵠悲獨宿將

雛繞樹飛裴裒

醉歌送吳錦雯孝廉歸武林

西陵詞客多如麻  
騰踏開元有數家  
吳郎傑出晚相見  
吸盡天台上霞  
長安出門塵十斛  
一日孤眠意亦足  
如君不厭往來頻  
肯把新詩借我讀  
君今年已四十強  
鬚髯如戟鬚毛蒼  
誰使燕臺困天馬  
商歌慷慨摧中腸  
我有一言君勿忘  
窮愁萬事緣文章  
不如拂袖草堂去  
短棹西湖荷芰香

病中程幼洪翰林季天中給諫各枉餽問

一官鬱鬱暗成疾他人炙手吾抱膝  
長安車馬豈不多閉門獨坐空悲歌  
已愁僮僕盡飢色那更參苓充飲食  
今朝病起憶鮓魚食指蠕動不可得  
秘書知我有所思為求嘉饌開心脾  
買得銀鱗箸未下水盤移贈及朝炊  
同心復有季黃門越陌相存如弟昆  
江陰子鱗來千里蘭陵美酒分一尊  
病夫七箸猶未健感此意氣加盤飧  
吾豈小人懷口腹朋友膠漆古所敦  
況有新詩療飢渴

五侯之鯖何足論

家叔生日聞留滯山陰有作

我今通籍七年餘服官僅滿三百日野人不合遊金門  
半是艱難半愁疾往事傷心勿復言坎壈只今猶未畢  
風塵馬上倦開顏兒女夢中來繞膝薔薇花盡榴花開  
愁劇佳辰罷舉杯冠蓋滿堂非骨肉富貴於我何有哉  
長安達官賤珠玉秋曹八口憂饘粥憂能傷人人易老  
歲月遷流如轉轂別時我叔淚霑衣白頭重卧剡溪曲

一觴寥濶三千里顧影茫茫淚相續何如歸向敬亭雲  
手種桃花偃茅屋

贈湘潭王山長兼謝其作畫障

騷人昔日沈沅湘不意天壤之間有王郎此語雖唐突  
贈君殊不妨男兒詞翰皆礪礪安能低頭逐隊無短長  
愛君有膽大如斗看君用筆如用帚狂吟潑墨勢離奇  
豎儒晚笑驚且走我獨披圖盤礴久楚山峭湘水愁風  
林湛湛九疑秋記我當年腸斷處扁舟曾向此中遊

送王懷人亦世兄弟歸漢陽

王家兄弟天下少  
高歌激楚長安道  
武昌明月洞庭雲  
超然出入君懷抱  
繁花落盡秋草腓  
鸚鵡洲邊鷗鷺飛  
弱冠上書成老大  
敝裘何處尋漁磯  
莫學蕭條漢陰叟  
掉頭抱甕都忘機

贈嵇叔子孝廉

嵇子淮南客相逢  
在燕市酒酣耳熱髯盡張  
怒決黃河天上水  
爭言叔夜是前身  
誰識荆軻猶未死  
頻年獻賦

又空還蒲帆歸去幾人閒他日高歌攀桂樹思君倘在  
八公山

簡方吉偶同年索畫

故人能詩復能畫胸中丘壑籠十洲丹青磅礴渾漫興  
人言君是顧虎頭我有鶯溪絹一疋領取烟巒挂蓬室  
五日一石十日水如何三月不下筆祇今我病愁蹉跎  
江上青山歸夢多安能突兀置我層巖絕壑間使我青  
鞵黃帽影婆娑與君酌酒為君歌聞君宦遊氣豪壯曾

踏龍湫與雁宕不妨潑墨為此圖卧遊想像一惆悵

張穉恭為余圖白雲樓時奉使祀河歌以送之

我家宛水濱結廬敬亭麓敬亭山上多白雲飛來飛去  
繞茅屋別來京洛心悠悠一官又卧白雲樓拄笏西山  
來爽氣掉頭不敢干公侯張子灑落塵中仙贈我琅琅

金石篇胸吞廣陵濤八九噴作華山千丈蓮

張闕中人  
流寓廣陵

懷余百尺樓頭卧揮毫遣興成雲烟長松古柏半不見  
迷離碧靄連蒼天馮闌獨立者誰子側耳髣髴聞清泉



如君畫手不易得白石枯枝淡無墨亂山落紙疾如風  
坐客驚看皆失色君今四牡指黃河竹西鼓吹重經過  
白馬玄圭告成事黃鸝紫燕春風多噫嘻淇園竹盡瓠  
子歌宣房築室今如何歸來圖畫獻

天子與君更醉金叵羅

淮南行送張鞠存同年

張子天官之大夫文章冰鑑當代無鳳池螭陸含香趨  
峻岫玉樹凌天衢少年努力策高足胡為拂袖歸江湖

神龍矯首不得志有時戢角走平地人生富貴風中塵  
蓬轉沙飛愁殺人要津挂冠那可得不爾左遷亦抽身  
聞說淮南多桂樹枝葉連蜷暗朝暮半畝草堂桂樹邊  
八公踟躕下烟霧張子自是張季鷹秋風未動思蓴羹  
留侯晚逐赤松子彭澤豈辱陶淵明如淮之酒百斛傾  
高歌激楚金石聲東山捉鼻恐不免請君大笑淮南行

送張友鴻歸雲間

并序

施子官比部與時彥諸公數集友鴻所張譙明許菊

溪趙錦帆顧介石吳六益沈繹堂皆詞學相友者也  
居無何或遷或出友鴻又別我去僕雖病其能無一  
言為作長歌壯之矣

張子十日不相見一日別我去如箭把酒留君君不留  
笑索新詩當祖餞京華旅食似君稀文來風流誰不羨  
丹青已入明光宮詞賦還傳柏梁殿雲間才藪不可當  
吳子沈子爭翱翔牆東招手顧子出春燈夜雨傾壺觴  
中州三子各意氣迴鞭聯轡登君堂祇言醉歌共朝夕

誰知轉眼愁河梁燕吳秦豫各分散東西咫尺成參商  
張子別我情更苦躊躇把袂九回腸平生好客哀王孫  
鸛鷓典盡開金樽衆中許我獨知己紛紛交態聲欲吞  
長安謁客如叩閤浩然鼓枻歸江村辟疆園亭頗不惡  
柴桑松菊今猶存泝吳淞兮斫鱸膾寧辟荔兮紉芳蓀  
回首它年西北望應憐方朔老金門

苦雨篇

階前不合蛟龍走瀑布飛騰穿戶牖屢驚驟雨怒翻盆

更看飛電大如斗，九衢萬戶皆洪濤。  
蒼穹下墜滹沱高，垣傾壁塌知何限。  
但聞野哭聲嘈嘈，我棲客館作官署。  
屋漏更無容膝處，兒童狼藉坐泥中。  
疊架匡牀暫箕踞，老夫食性怕炊煤。  
河魚疾發腹轟雷，寸薪尺壁那可得。  
蛙生塵釜空裴裒，北嘗苦旱南苦雨。  
防河掘盡中州土，竹竭山平瓠子愁。  
幽燕又見商羊舞，淫淫日夜憂如何。  
海陬未息長鯨波。

醉後歌訓趙錦帆兼呈丁飛濤

卧疴一月生秋草久雨柴門跡如掃趙君立馬下階前  
尊酒論詩恣傾倒君詩橫絕天下知掉頭不數雕蟲兒  
同舍為郎執余手愁中相視開鬚眉才雄氣莽天地窄  
老蛟怒吼長河圻謂余能不操吳音直是中原一詩伯  
我友敬禮來西陵揮毫爛漫如雲蒸君言西署吾曹在  
三分割據爭峻嶒狂呼不顧旁人笑游俠何妨狎屠釣  
王李諸君官陸沈姓字千秋日照耀聞君作令賦甘泉  
七載囊中無一錢三年執戟顛毛白當塗誰復知其賢

人情惜官不惜才揚雄賈誼終塵埃請君放筆且掩口  
明日同歌歸去來

厯下送畢四世副使姚榕似運使同赴官嶺南

君不見太行王屋叅天起畢侯墮地稱才子又不見茗  
溪浮玉生清光姚家兄弟爭翱翔當年卧病白雲樓曾  
同畢子凌高秋手持黃紙向西粵姚生努力相綢繆兩  
賢骯髒誰能伍萬古心胸一朝許漂泊聯翩出國門齊  
州忽集同心侶豪氣真看岱岳低懽情頓釋樊籠苦左

提右挈太殷勤把臂酣歌海內聞璽書一旦九重下星  
輶雙指羅浮雲驪駒催人不得駐舞絮回風暗如霧羊  
城碧草秋更香梅嶺寒花冬滿樹南粵山川真壯遊翡  
翠明珠百不愁絳襦仙人天下美銅柱孤標萬載留丈  
夫跼蹐眼前地何如嶺嶠看滄洲滄洲回首穆陵關迢  
遞風烟不可攀一杯祖爾嵒湖上流波別淚兩潺湲

今日行留別王偉樹廉使

王偉樹按察粵西余奉使相接懽甚及北歸聞桂林



陷度王不免次豫章值其子往省覲路阻慟哭而返  
今六年矣王遷粵東左司歸里亡恙而其子已客死  
賦今日行

今日相逢是何日握手開尊重促膝回想桂林奔迫時  
欲言嗚咽聲不出桂林疇昔何殷勤忘年爾汝成膠漆  
許我新詩逼古人執卷高吟散愁疾星巖仙洞憶同遊  
惆悵懽娛忽相失灘江烽火渡豺狼城頭流血殷瀟湘  
君在圍城余間道天南地北兩茫茫令子中途驚問訊

招魂引領斷人腸誰知玉樹轉摧折白首逢君歸故鄉  
龍鬚華席鸚鵡研綈袍嗟嗟不可忘人生聚散亦何嘗  
為君努力傾百觴明日東西征路長

望日樓同揚登州張蓬萊看日出

日初出時一線橫袤長可竟天有頃作方幅稜角色  
深赤如丹砂已而燄如火外有絳帷浮動眩目萬狀  
久之赤輪涌出厥象乃圓光彩散越不彈指離海數  
尺其大如鏡其色如月矣

燭龍夜半開大荒羲和振轡嚴晨裝珊瑚十丈橫天出  
乍看弦直忽已方動如萬馬颺朱旗爛如金屋堆琉璃  
絞綃茁茁作帷幃髣髴隱見無端倪車輪暄暄從中躍  
赤烏飛起彩雲落光銍倒射竈竈宮扶桑枝罨蓬萊閣  
客云日出光不同陰晴百變隨神工連朝霾霧今日霽  
使君天許開鴻濛數言未畢日千尺翻如素月城頭出  
天明萬里從此生安得長繩繫白日

蓬萊看海市歌

校士東牟思見海市事竣謁海廟因禱焉翌日臨發  
海市適見歌以紀之

蓬萊海市光有無玄冬物色誇大蘇我亦再拜乞海若  
願假靈異看須臾是時苦旱海水竭神龍困懶枯珊瑚  
鼉鼓忽鳴津吏呼天吳出舞蛟人趨大竹盈盈橫匹練  
小竹湛湛浮明珠方員斷續忽易位明滅低昂頃刻殊  
列屏複帳閃宮闕桃源茅屋成村墟沙門小島更奇絕  
浮圖倒影凌空虛有時離立為兩人上者為笠下者車

砉然雙扉開白板中有奇樹何扶疎三山十洲一步地  
羣仙冉冉來蓬壺神搖目眩看不足惜哉風伯為驅除  
人間快意亦如此浮雲長據胡為乎噫嘻浮雲長據胡

爲乎

大竹小竹沙  
門皆島名

東萊贈趙赤霞太守

趙嘗守潤州為處士顧  
與治先通賦士類多之

使君五馬臨江濱筆剪東吳半江水使君拂衣卧海濱  
手闢荒園成栗里七尺骭髀千夫雄坐上客滿尊不空  
慷慨平生尚遊俠窮愁坎壈成老翁園中嘉樹何歲隳

海燕裴裒不忍歸酒間袖出故人札數行未畢淚霑衣  
作詩贈君兼語顧離愁如緒如烟霧颼風刮海海水飛  
何時却寄珊瑚樹

東海道中作

行人策馬馬行緩馬上風吹衣帶斷枯桑倒折作飛蓬  
驚砂走石摩蒼穹海濤怒嘯鮫人舞飛廉作祟天不雨  
可憐二麥急甘霖農夫淚濕田間土

禹廟歌

充東禹廟臨汶河凌雲結構何嵯峨棟宇有時橫荇藻  
旌旗白日驅鼃鼉五月陰風冷毛髮參天古木交婆娑  
繁華細葉宿鸞鳳神依鬼護無斧柯後亭更有千年柏  
枝是琅玕幹為石化作蒼龍上赤霄頭角鬚髯如刻畫  
吾聞神龍見尾不見首此物還能靈異否怪底頽垣苔  
蘚中夜來風雨聞龍吼

送高阮懷歸里兼訊大美季升杓司幼龍諸子

明湖六月荷花香宛溪故人歸故鄉折柳餞君各未醉

憑闌日暮立相望與君少長生同里共許詞場執牛耳  
彩毫灼灼耀春葩雙瞳湛湛懸秋水千里綢繆更契濶  
論交夜夜燈花落欲歌欲泣君同聲相知不復然疑作  
子今歸去石城秋月秦淮青雀舟桂華窈窕芙蓉發  
高歌一曲凌滄洲白門歲豐多釀酒青錢三百沽一斗  
旋膾鱸魚剝新栗此時還憶勞人否同心更有蔡與梅  
窮愁襟抱向誰開歸去相看應大笑新詩一句一傾杯

送戴姑瞻入都



十月餞君歸五月喜君至尊酒復相於顛倒不能寐憶  
昔奉使雲門遊值君按節過青州燈前長句為君賦狂  
歌大叫風颼颼臨岐下馬握余手停杯佇立裴裒久自  
言辛苦難具陳不信但看余白首轉眼東西羽翼分京  
洛緇塵倦趨走何期爾我相後先同官仍是同門友憐  
余直道多欽寄開心苦口真吾師加餐相勸廢篇什此  
意苟人那得知勞勞余髮亦垂白看爾吐氣開鬚眉璽  
書徵拜還青瑣岱雲濟水隨旌旗送君忽憶心所懼故

人同調滿長安欲寄雙魚媿疎嬾憑君傳語青雲端

趵突泉送嚴子餐都諫北還

時主考山東

傳聞此泉來王屋伏流倒涌歷山麓寒光噴雪復飛雲  
大聲奔雷小碎玉故人黃門天上来崔嵬百尺龍門開  
憑陵日觀照滄海咄嗟坐嘯生風雷臨流復有千尋閣  
白雪聲名赫如昨黃門揮翰似青蓮更擬新篇致康樂  
為君開尊握君手素心海內真良友年將強仕相伯仲  
忍使離居成皓首扁舟昨日明湖遊驪歌今日生離憂

君不見濟南七十二泉皆在眼那堪溝水東西流

陸大夫廬母墓雙鶴來巢生二雛有鶴在焉或曰  
孝所感也繪以傳之

荒丘鬱鬱寒泉深松楸手植成青林中有慈烏口流血  
哀啼繞樹傷人心老鶴翱翔下寥廓將雛雙鶴復孤鶴  
鶴鶴悲哀未忍飛啁啾墓側悲離索於乎陸大夫鶴兮  
鶴兮今在無至誠感物理不殊吾母佳城求未得淺葬  
荒丘天一隅為君短歌淚霑襦

漢柏行

泰安州  
嶽廟

根不必踞絕壁枝不必摩蒼天  
娑娑嶽廟眼前樹輪囷  
屈曲幾千年龍文蛇腹復猿臂  
鐵幹蟠空少根蒂岱宗  
玉女旌旗翻百靈半夜風雨會  
常偃畢宏畫不得神物  
旁觀空歎息春暮天寒鶴鶴悲  
陰霞繞樹沈雲黑崔嵬  
祠廟已頻災唐槐灰燼秦松摧  
武皇六龍逝不回嗟爾  
古柏胡為乎在哉令我哀歌矯  
首心裒裒

靈巖行

在長  
清縣

靈巖開鑿巨靈苦萬仞丹梯作環堵已留天穴爛明星

更遣甘泉瀉石乳僧廊側入洞門深鐵崖涌出袈裟古

鐵片如衣  
名鐵袈裟

腹空禿樹飽風霜斗大蒼藤暗烟雨丹臺飛

嵌層巖巔削成石屋居無椽杖藜直上八千仞手撫白

鶴凌紫烟朗公卓錫呼不應龐眉石丈拱我前

山有石  
如人立

名朗公石

俯視人間悲浩劫誰知梵宇亦桑田般舟寶殿金

銀摧世尊塵埃龍象哀唐碑宋碣紛斷折存者歆側埋

荒苔靈蹟摩挲恨未了倦遊一宿良草草誰能高枕卧

空山飽飯青精顏色好

讌歌行

陸使君  
席上作

洞房曲室鎖葳蕤華燈綺席紛光輝朱顏窈窕操玉徽  
笙竽箏笛逸響飛輕風入戶颺羅幃月何皎皎明星稀  
樂極含悲知者誰更闌緩帶客忘歸儂歌薄命心裴哀  
願君懽樂憐春暉

學餘堂詩集卷十六

欽定四庫全書

學餘堂詩集卷十七

翰林院侍讀施閏章撰

七言古

烟火行

濟南亂後年初豐上元鼓吹如江東歌兒遊女不知數  
千家萬家春燈紅爆竹聲中烟火出忽如燄發阿房宮  
撲地流光走玉兔垂天列炬成燭龍橫看爛漫三十樹

風起高城滿烟霧明星落月飛縱橫急電驚雷莽回互  
層層怪幻魚龍戲蜃樓海市須臾至蓮花火裏劇分明  
中有天下太平字是時憲府高崔嵬建牙列戟傾金杯  
烹羔炮鼈惜良夜黃金灰燼同塵埃酒酣漏永回鞭去  
人壓看場呼不開我聞此地舊王府夜夜鰲山照歌舞  
綺羅臺榭總丘墟園林寂寞今無主樂復樂兮延千秋  
醉歌莫問王與侯何日中原罷烽火華燈如晝長遨遊

伏生祠堂行



祠在鄒平城北十八里漢文帝遣鼂錯求尚書時伏  
生年九十餘令幼女口授事不見漢史今圖之壁

祖龍烈燄燔天地斷簡殘篇盡捐棄諸儒白骨成山丘  
倉頡史籀夜垂淚上蔡李斯甘罪首忍使萬古斯文墜  
天遺一老在人間火然不到胸中字須臾赤帝重瞳來  
阿房一炬咸陽灰表章經學漢文出詔求耆舊過徂徠  
是時先生耄且病以口代手鴻濛開二十九篇尚書備  
配享立廟何崔嵬我來再拜心傍徨側身望古涕霑裳

避秦博士窮獨叟姚虞三代今未亡  
龐眉碧眼具冕服  
丹青滿壁生輝光  
有女被繡珥明璫  
受書掌故拱其旁  
豐碑古篆不可詳  
諸生俎豆歌樂章  
靈旗髣髴來翱翔

送張泰安越九

時坐事逮繫  
謫戍後放還

山城積雪冰不開  
飛來黃鵠久悲哀  
見君欲哭復大笑  
舉酒一飲三百杯  
疇昔蹉跎事奔迫  
窮邊極漠甘遷謫  
聖恩溫詔垂九天  
獨許雲間作歸客  
泰山極目連滄海  
海鷗釣客遙相待  
何必功成問赤松  
流光一擲紅顏改

多君意氣凌浮雲  
罷官慷慨尚論文  
庾鮑才名伯仲少  
原嘗好客天下聞  
我醉為君歌一曲  
歲暮愁多腸斷續  
好去五湖三泖間  
手撫山堂舊松菊

繡江行

章丘縣東

義仲驅車錯躔度  
玄冥奪取青陽路  
三月重凝繡水冰  
烈風倒拔陽丘樹  
天河滄海同翻覆  
雪染桃花成白玉  
茂陵消渴鸕鶿寒  
望遠傷春亂心曲

女郎山

女郎山畔日冥冥女郎墓上草青青長白雲連繡江水

長白山名登女郎望其雲氣縈抱如帶

長佩陸離飄未已凭闌舉酒舞且

歌深洞幽房山鬼多黃土紅顏自今古淅淅陰風吹女蘿

父書樓歌為俞去文作

吾鄉前輩多博雅南金先生稱學者有閣三重書五車  
高卧樓頭不肯下亂離萬事成東流銅駝金谷皆荒丘  
青箱好在蓼莪痛歸然遺澤存高樓樓前楓樹林樓下  
寒潭深白鶴為君舞玄猿為君吟山鬼窈窕尚含笑伯

牙寂寞無知音腹笥便便君自可次第書籤兼藥裹賣  
文剩有杖頭錢雞黍能留佳客坐藏書十九委埃塵百  
家七畧誰問津長恨古人不見我空山月黑傷千春

寄蔣虎臣金壇

先是京口之變士大夫家居者皆坐法惟虎臣獲免

昔君校書石渠閣鄉心日夜思丘壑今君乞假卧江村  
三年不向春明門春明吏隱差不辱索米東方足饘粥  
何事高吟詩百篇便向陰崖結茅屋瀟灑從來懷抱疎  
黃金不惜搜奇書道逢窮交下馬立解袍脫贈無躊躇

尺書遠自金沙至，開函墮我數行淚。不訝虞翻踈節多，殷勤却索新詩寄。江干昨日多鼓聲，白骨黃塵咫尺迷。茅屋高齋亡恙否，鯨波鼉浪風淒淒。古人挂冠入山好，今日入山難。自保愁思如結未，敢言何處相期拾瑤草。

姑山行送郭瑞屏

十年不向姑山去，別恨羈愁亂如霧。攢冠草屨故人来，相看猶似山中住。衙齋蕭瑟客無羶，片石荒臺倚獨樹。主人鹿鹿竟何為，論心不得同朝暮。記昔姑山夜坐時，

石泉手汲炊松枝傾盤芋栗雞黍酒盡牀頭醉不辭  
輶軻君今垂五十白髮星星時抱膝縱飲不多思醉眠  
怕聽城頭吹戩栗君為窮愁來海濱到來輾轉愁官貧  
出山入山貧自好路遠天寒慙故人

荒雞行

長夜漫漫纔二更濟南城裏雞齊鳴勞人鞅掌未眠卧  
起視欒槍淚雙墮昔人聞雞夜起舞雄心不厭亂離苦  
可憐四海今橫戈荒雞荒雞奈爾何

觀嚴水子畫人物引

嚴水子陸山子  
並陳章侯高弟

山陰高士陳章侯開闢畫苑無虎頭左手把杯右執筆  
十指酒氣生十洲尤工人物作殊態雕鏤瑣屑窮纖芥  
詭形奇狀人盡驚素壁中宵走光怪興闌箕踞時捫蝨  
尺幅千金不可得晚傳二子早升堂吮墨含毫同侍側  
山子過從憶鑑湖淋漓染翰多歡娛五年以後水子至  
筆勢不與章侯殊冥搜慘澹追清妙欹側江皐連海嶠  
芙蓉薜荔雜連蜷帝子嬋媛山鬼笑名高薄俗復何益



能事傷心爭促迫  
乞畫如山乏酒錢  
仰視高天岼赤幘  
春陰積雪風泠泠  
滿眼干戈愁客星  
冰開鼓柁且歸去  
萬壑千巖無數青

閘舟謠

漕渠久渴水不流  
漕艘銜尾無時休  
日過一閘纔五里  
千里歸心愁白頭  
閘盡灘高更偃蹇  
中夜呼船重撥淺  
貓兒窩口居人稀  
魚頭集上漁船歸  
岼濶河深風又惡  
坐看他帆拂面飛

林茂之自作生壙曰繭窩索詩紀之

八十一叟顏尚酡幅巾筇杖衣薜蘿肩輿強來一相見  
數杯未盡能高歌自言築室乳山住陰林邃谷多烟霧  
新營生壙大如繭逝即長眠不封樹蹕絕才名年少時  
掉頭不許時人詩祇今垂死猶眼白自作高人萬古宅  
君不見富貴磨滅皆輕塵豐碑石馬空嶙峋北邙悲風  
愁殺人

萬竹園醉歌贈鄧元昭同年

城隅別墅結茅屋千畝陰森盡修竹同心握手此開尊  
竹色客衣相與綠五年南北成別離昨歲干戈亂心曲  
鮒魚蘆筍雜蓴羹百觴勸我苦不足昔時侍從官長安  
對客揮毫人共看意氣風流天下重五侯七貴爭交歡  
一朝特簡擁千騎未許淹留問叢桂歲星忽厭隱金門  
便擬牆東長避世羨君躡屐臨東山清歌白苧長歡顏  
羨君藏書餘萬卷烏篆龍文時在眼丈夫功成須拂衣  
扁舟新買繫漁磯飄搖萬事君休問惟有浮雲無是非

程穆倩印藪歌

黃山山人真好竒性癖膏肓不可治雕鏤文字壽琬琰  
蟲魚錯落蟠蛟螭苦心愛者有數子摩挲隻字等禹碑  
亦如昌黎推作者險奧不廢樊宗師九月邗關木葉下  
山人邂逅同僧舍自言好古非雕蟲篆籀周秦足方駕  
詰曲迷離多不辨相逢十人九人詫可憐古籍秦火焚  
存者如縷金石文岫嶠鐘鼎盡竒字恍惚天矯凌浮雲  
今人能手類刻木仰唇俯足徒紛紛豈若山人眼空六

書與八分驚魂駭目天下聞噫嘻山人好古不能長得  
食何如歸老黃山三十六峯之南北赤文綠字藏其間  
風雨千年無剝蝕

水繪庵放生池歌贈冒辟疆

水繪庵前一池水花發芙蕖香十里冒家三世皆放生  
水族波臣不可紀日霽遊鱗鏡裏來有時蜃氣雲不開  
出沼穹龜峙丘垤揚鬣赤鯉生風雷四十年来成巨壑  
絲竹朝朝喧水閣賦詩不讓鄴園遊臨流遠勝濠梁樂

滄桑萬事難具陳挺义橫網連強鄰雲根窟穴改不得  
枯魚入肆空悲辛主人意氣無所惜長歎撫膺嗟世澤  
虬龍一朝不自保江漢飛騰限咫尺眼前兵甲高如山  
放生殺生皆等閒昆明太液復何有為爾作歌長留天  
地間

僧舍題半山畫

常愛杜甫閬山句應結茅齋看青壁半山縱筆為此圖  
突見峻嶒倚天石寒江鼓枻倦遊人秋寺鳴鐘獨眠客

與君痛飲且還歸四顧茫茫堪眼白

廣陵醉後贈陳曼仙同年

陳舊官蜀  
自免歸

拂衣不採商山芝草堂不羨浣花溪  
暖老爭看人似玉把詩自勸醉如泥  
開軒種竹江雲入素甕酌酒嘉賓集  
洞簫鐵笛相和鳴玉柱檀槽雜歌泣  
芙蓉含霧暗氤氲婀娜吳姬嬌出羣  
輕謳緩唱四坐靜不動朱唇聲遏雲  
十年契濶今良會宦遊忽叙巴西事  
羌村蠻洞畏豺狼哀角腥風動天地  
萬里生還信偶然銜杯且稱平生意

主人瀟灑良得計有客風塵早憔悴  
柴桑夙昔無宦情  
東山偶起憐蒼生  
昔何勇健今何老  
歸卧雙溪弄月明  
擊鼓行戲贈方山人

山人不儒亦不賈  
碧樹黃花繞庭戶  
客到開筵雜儔侶  
半醉掀髯為擊鼓  
衆賓歌吹間搏拊  
疾徐應節不差忒  
大聲噉噉鳴砧杵  
細聲嘈嘈亂人語  
音繁調促苦齟齬  
激厲崩騰怒如虎  
地維缺陷天難補  
人生磊塊向誰吐  
不如撾鼓盡清醕  
半作英雄半兒女  
尊殘颯颯寒夜雨



因君側耳愁千古  
禰衡禰衡在何許  
吾欲呼汝出黃土

竹亭短歌贈王貽上

丈夫名成何必萬鍾粟  
但得繞屋扶疎萬竿竹  
三月不肉亦意足  
不爾伐竹結為廬  
差抵瀟湘遠塵俗  
使君佐郡廣陵城  
高齋遠聽寒濤聲  
却構竹亭如箬笠  
琅玕四壁青  
霞生亭中斗酒書千卷  
對此髣髴凌絕巘  
南軒老槐遮白日  
東籬黃菊照蒼蘚  
別君此去惜離羣  
幾度論詩到夜分  
眼前萬事難開眼  
還須種竹高拂雲  
君不見

君家子猷舍亦爾爾何可一日無此君

龍衣船

連帆蔽日江水黑鷁首龍文爛五色舉檣換舵重如山  
不遇大風行不得曳舟官給夫有餘得錢縱脫重捉夫  
裸體天寒被鞭撻荒村夜索聞哀呼猪雞祭賽舟人樂  
白奪樵薪不為虐有時故遣觸他船反眼嗔人橫榜縛  
尊嚴祗為載龍衣簫鼓船頭黃繡旗高架一箱衣什襲  
客貨深藏無是非巨艦年來頻坐兵沿塗夫卒多吞聲

船大行遲河欲凍嚴秋督促傷人情官差到處聞荼毒  
怪此篙工作威福造船苦耗水衡錢取材伐盡江南木  
側聞

聖主仁如天再浣還衣天下傳筐篚置郵亦良速何似  
重牽萬斛船

華表行

華表嵯峨冠青嶂雙擎巧刻盤螭樣璽書賜葬倚陵園  
連牛鞭石來山上千金作使萬夫役淙埋直作天生石

勢移衛霍子孫貧斥賣須臾都不惜地坼山傾鬼哭聞  
前山華表又新墳請君易石將木柱縱朽猶為墳上土

祀蠶娘

華燈白粥陳椒漿田家女兒祀蠶娘願刺繡裙與娘着  
使我紅蠶堆滿箔他家織縑裁羅襦妾家賣絲充官租  
餘作郎衣及兒襖家貧租重還有無蠶時桑遠行多露  
好傍門前種桑樹

打虎兒

禹州朱  
氏子

誰言虎尾不可履虎口小兒還不死兒隨隴畔翁耕田  
斑斕躍出黃蒿裏攫翁踞地兒不啼怒持竹策鞭虎起  
咆哮乍息重含情収牙捲舌拋人行父子倉皇驅犢返  
猶聞虎嘯腥風生刺史嗟吁台兒問兒年十一朱其姓  
簪花纏彩萬人傳樸樗能馴猛獸性當時視虎如視牛  
天地震動山靈愁死生計較勇成怯古來赴義無回頭

天逸閣雪後醉歌

主人梅幼龍  
耦長携酒

一冬無雪春雪好名園飛閣開晴昊主人逸興有籍咸

把酒呼朋歡絕倒沙霽初聞白鳥鳴雪殘半露青峰小  
麻姑綽妁墮窗間疊嶂叅差浮樹杪細數梅花多昨日  
坐看新瀑通寒沼觥籌歷亂興偏豪石檻苔痕不須掃

此閣峻嶒高百尺先輩聯翩著靈蹟

禹金朗三兩  
先輩讀書處

蚪蚪

深藏禹穴書賦詩日集梁園客二十年来玉樹摧竹榭  
茅屋蔓蘿薜抽毫授簡待吾曹肯使中原少詞伯前年  
鐵騎城頭嘶出門一步迷東西芳春暇日此良宴何辭  
斗酒聽黃鸝我思置閣臨雙溪種梅高下溪雲齊花前

歲歲同春酌醉醒遞換無端倪

為李書卿感遇

有叙

李氏世以文辭稱生又穎特弱冠為諸生高等然其  
為文與時人異卒坐廢斥予感憤作歌為生進酒

日月明明不照地  
疾藜滿眼困騏驥  
欲叩天門局不開  
為君怫鬱墮清淚  
老蛟生子真超羣  
少年勝氣驅浮雲  
囁嚅羞作腐生語  
一寸泥蟠無處所  
壯夫魁壘常骨立  
俗眼揶揄百憂集  
唾壺擊碎歌不揚  
風雨夜闌鬼神泣

青桂引贈丁飛濤弟素涵

有青桂堂集時  
飛濤謫關外

青桂團團臨綠水香風散入江城裏東南孔雀為裴裏  
下有寒猿啼不已山人奮袖歌且謠西湖澹澹吳山高  
艷曲新詞半樂府瓌奇詭譎疑離騷有時嗚咽抱幽怨  
弱柳如絲絮如霰歌成流水雲不飛曲鼓湘靈人不見  
君家伯氏吾弟兄唱和西曹金石聲黃雲沙磧一分手  
朔風越鳥長哀鳴攀君青桂憂思緩念君連枝腸欲斷  
日月不居關塞長撫膺淚落錢塘滿



西湖送春歌

陰雨冥冥朝復暮  
豐隆屏翳收春去  
美人魂斷不可招  
夜啼杜宇西陵樹  
故園滿檻洛陽花  
歲歲花開不在家  
江山格鬪九州窄  
行止蹉跎雙鬢華  
含情欲作留春曲  
燭龍昂首不得伏  
醉向流光喚奈何  
門前春水為誰多

采蓴篇

西湖三月蓴始生  
含花卷葉浮綠莖  
質柔膚滑不留手  
白汁盈盈成水晶  
浸之經宿逾肥美  
旋摘生新類蘭芷

春山雨漲綠波深，欲浮不浮難出水。故人招我放生池，  
畫船紅袖吹參差。神魚撥刺動雷雨，馮夷出沒褰旌旗。  
酒闌却向湖亭泊，緩帶登樓氣盤礴。急呼舟子擷蓴絲，  
雪鱠金盤佐觴酌。凝脂膩澤難禁煮，玉筍錦葵誰似汝。  
滑翻碧盃匹水漿，清絕香羹奴酪乳。嚼腐餐肥良可憎，  
五侯七貴知未曾。怪來此物繫歸思，千載常懷張季鷹。

西湖看月歌

同會稽  
羅弘載

客舍階前湖水綠，棹舟更向湖中宿。兩岬蒼烟皎月來，

萬頃清光照幽獨渡口微聞漱玉聲樓頭無復彈箏曲  
片雲蜿蜒過南山望見仙人騎白鹿夜深風起何泠泠  
遠山猶白近山青浮圖層級真可數波心寒玉吐孤亭  
援琴欲鼓水仙操鍾期既遠誰為聽狂呼不醒童僕睡  
惜哉酒盡雙玉鉶吁嗟明月古來有須照西湖杯在手  
可憐客久春芳歇陰雨三旬初見月荷葉田田漸作華  
今宵月下已思家漏殘高枕日將出會有吳姬蚤浣紗

贈闕西杜蒼舒兼懷李杞瞻孫豹人諸子

西冷橋畔日初低  
西京上客過招提  
眼中華嶽森突兀  
湖干畫舫從羈棲  
十年讀書不射策  
負氣論才岍赤幘  
仲宣時賦從軍行  
少陵老作諸侯客  
滄海長江正羽旗  
廣陵遊俠重相思  
好買吳姬住江側  
醉倚淮南桂樹枝

李孫皆陝人  
流寓廣陵

寄周處州宿來

舊同官  
比部

故人別我六年餘  
聞道故人青鬢疎  
層山疊嶂幾千里  
殷勤却寄雙鯉魚  
天陰雨久重雲黑  
開緘狂喜復歎息

新詩險絕語驚人苦調悲涼淚沾臆括蒼巖洞多烟霞  
九盤石門仙如麻謝公遊處莓苔厚春風古樹猶開花  
兵荒作吏真可憫鞭撻催科心不忍滿眼青山未散愁  
平生意氣一朝盡甌江日夜流滔滔相思心曲翻洪濤  
欲問論詩興酣發斷腸還憶白雲曹

送羅弘載

聞君有別業遠在稽山隅白雲南接葛洪井綠水還臨  
康樂湖湖邊山下讀書好雜花奇樹連芳草殷勤為我

渡錢塘西冷尊酒同傾倒與子契濶已八春囊中詩句  
轉清新少年策名應努力莫羨桃源洞裏人

西湖惜別吟答蕭山毛大可

西陵才子有毛萇浩蕩風流不可當繁音錯彩百端集  
短曲長歌悲斷腸謂我東來自滄海湖上輕舟日相待  
手裂吳綾白如雪新詩界兀驚真宰蓬萊之閣瑯琊臺  
海水壁立魚龍哀嗟爾濡翰一何壯使我回首久裴裒  
我昔聞聲未睽袂相隔山巔與水裔擁楫臨風作越吟

纏繇期我攀叢桂別來叢桂難重攀天涯荏苒凋朱顏  
謝傳東山不得卧歲星索米愁人間平生聞道苦不早  
窮愁著書亦云好誰能漂轉隨車塵使我局促傷懷抱  
予將去為君吟此曲歷亂無古今若問相思在何處歲  
歲西湖春水深

哭同年張子寅

海風動地白日昏折我玉樹垂崑崙魁梧磊落猶在眼  
滿堂慟哭皆聲吞鬼伯詎敢相促迫豐隆為御雲車奔

一生胸臆向誰吐  
裂眦慷慨號天門  
嗚呼天門路阻絕  
江漢漠漠墮孤月

二

嗟爾生年二十六  
氣吞萬卷心不足  
開樽結客少年場  
走馬長安還擊筑  
雕龍世業公車早  
詞翰橫流瀉飛瀑  
相看努力馳中原  
豈料着鞭成轉燭  
嗚呼爾魂不可招  
青楓暮雨空蕭條

三



出門出門何所營病中鼓枻江上行季布平生重然諾  
魯連排難輕死生男兒七尺自有命抗顏欲與雷霆爭  
風流意氣一朝盡眼前豪俊誰縱橫嗚呼往事不可諫  
目極松楸淚如霰

學餘堂詩集卷十七

欽定四庫全書

學餘堂詩集卷十八

翰林院侍讀施閏章撰

七言古

自皖江過彭蠡連乘迅風時予赴官湖西

風獵獵水茫茫青山兩岼如驅羊大孤小孤爭鵠首輕  
帆坐嘯陵馬當遠看五老之峰冒雲霧白頭如雪鬚髯  
蒼我欲往從之川路一何長不見青蓮與白傅至今猶

有讀書堂官限催人何太急風檣破浪橫飛揚誰知予  
夢在廬嶽暮雲回首勞相望

淦川夜讀王邁人方伯三仕草有寄

王在巴陵有嘉陵水聲歌

至是官豫章入覲

王子稱詩無古今哀絲雜管傷人心醉歌斫地橫霑襟  
丹楓叢篠金川曲把爾瑤華向銀燭朔風微霰響枯木  
巴南萬里豺虎滿曼聲促節隨長短一曲嘉陵腸寸斷  
羊城別後聚洪都立談未盡各天隅誰能對此不踟躕

李太虛宗伯自章門過訪蕭江值余按部未歸停

舟決旬聊書代柬

蕭江江頭楓葉赤雨雪行人斷行跡元禮仙舟何處來  
棲遲久作忘歸客水落章門上水難多君直到使君灘  
羽檄宵馳官吏急金尊咫尺阻清歡短札新詩勝瓊玖  
珍重摩娑不離手更携仙酒及良方使我紅顏無皓首  
感君意惜君留君家羣玉有高樓彈箏鼓瑟兼瑩篴天  
寒夜永宜歌醉惱殺孤眠一釣舟

彈子嶺歌

新喻縣北  
距城百里

渝川捕民如捕賊鳥驚獸駭各南北有時怒臂聚羣力  
遣騎飛符呼不得仰天峰外蒙山高中有仄徑緣秋毫  
夾路荆榛虎豹噪負嵎走險容爾曹巉巖更有彈子嶺  
居人半入青天影隔山十里越鄰境百年風俗成頑梗  
吾聞此鄉山水奇重巖邃壑多幽姿如何輸稅獨無期  
忍使催科困有司及此不戢後難治破巢殲滅中心悲  
爾不見黃木江前年殺人如薙草區區彈子何足道

黃木

江新喻縣地先是  
二年以民頑用兵

北風行懷方爾止

北風夜發猛如虎飛沙散作空中雨生米潭邊老蛟怒  
繫艇消魂望南浦浦前客舍有方生倦遊詞賦同馬卿  
泰岱恒嵩歸杖屨諸侯豪士爭逢迎昔時見君敬亭草  
我方年少君未老流光一別十餘春縷縷贈我長篇好  
醉罷秦淮舊酒樓君言逐我匡廬遊蓬飛去住各無定  
山人又上潯陽舟潯陽帆向章門落相逢正傍滕王閣

一尊未盡又開船  
浦雲山雨悲離索  
方生老健多苦心  
清歌慘澹矜知音  
出門道路盡筆札  
直寫胸懷無古今  
此時陳蕃亦多有  
周侯宋侯皆爾友

時周伯衡宋其武並官南州

洪

都穀賤官俸  
廉扁舟百石還  
能否多君好  
古存典型白  
眼却向東湖青  
荒郊苦問雲卿  
圃廢渚冥搜  
孺子亭六月王  
師移鐵騎窮秋  
絡繹將軍至  
滿眼江山牧  
馬場潦倒孺  
冠置何地祗  
今行路天下  
難莫訝乘車  
無肺肝烏鵲  
西飛雁飛北  
江楓渚荻皆  
凋殘秣陵草  
堂閒復閒殘



樽舊帙開心顏眼前萬事還山好歸去青谿明月灣

百丈行

十八灘頭石齒齒百丈青繩可憐子赤脚短衣半在腰  
飯顆寒吞掬江水北來鐵騎盡乘船灘峻船從石窟穿  
雞豬牛酒不論數連檣動索千夫牽縣官懼罪急如火  
預點民夫向江坐拘留古廟等羈囚說來不來飢殺我  
沿江沙石多崩陷引臂如猿爭叫嘯秋冬水溢春漲湍  
渚穴蛟龍岼虎豹伐鼓鳴鐃畫艦飛陽侯起立江娥笑

不辭辛苦為君行  
挺促鞭驅半死生  
君看死者仆江側  
火伴何人敢哭聲  
自從伏波下南粵  
蠻江多少人流血  
百丈不斷腸斷絕  
流水無情亦嗚咽

折梅舟中有歎

野梅無賴惱江邊  
爛漫春光發歲前  
折來心賞不能語  
靜覺疎香散洲渚  
舊時索米傍燕臺  
苦寒只見雪如梅  
豪貴萬錢買尺樹  
凍葢蕭條多不開  
昨歲雙溪歸草閣  
梅枯二月花纔着  
雨中憔悴苦相憐  
倚檻呼朋共觴酌

轉眼他鄉憶故人分飛零落太傷神孤舟卧抱花枝醉  
載盡江南無限春

陳士業徵君讀書樓歌

時兵艘皆泊章門

十日章江門不上滕王閣可憐帶甲滿江干烟雨蒼涼  
聞鼓角憑虛高卧有徵君一日不見如飢渴入門引手  
便登樓坐對西山控藜洲夕陽帆影簷前落曉霽山光  
榻上浮君家閨闕連雲起銅駝泣後歸流水杜門小隱  
種松筠帶索行吟佩蘭芷諸侯結駟多式廬先生獨坐

擁奇書蠹簡殘篇爭二酉哀歌痛哭懷三閭聞君侔儻  
多籌策昔領專城今草澤平生壯志託空言中歲蹉跎  
頭盡白滕王高閣雖崢嶸童子詩傳始得名爭似徵君  
有草閣千秋萬歲重含情

南浦逢王顧五同年

王自翰林  
出督糧儲

人生聚散如沙鷗江天海國各沈浮十載別君一相見  
茫茫歲月隨東流執手開軒坐榻上旋呼尊酌交勸酬  
梅花老春白鹿脯為君沈醉傾庶羞酒闌屈指同門友

惟我兩人同宦遊疇昔聯鑣君始達天祿石渠資討蒐  
隔巷招尋余最數素心晨夕相淹留踏花緩帶歌燕市  
繫馬銜杯傍御溝此後驅馳踰粵嶺君亦謝病歸林丘  
天憐索處易憔悴蓬飄萍聚來南州令子成行孫在膝  
那得相看不白頭西江厥賦稱瘠土亂來荆棘盈田疇  
力盡犁鋤又水旱荒村野哭聲啾啾漕折爭言便民力  
追呼榜繫如俘囚糴糧三石當一石倒廩傾倉還賣牛  
玉粒徵收又難運兵船絡繹無餘舟催科箕斂敢言拙

遺黎溝壑何人收積薪厝火且安坐更惟執法無良謀  
君昔善奕名國手手談清讌今能不丈夫愍時心慘澹  
中宵側足行夷猶回首故園憶松桂可憐山谷橫戈矛  
墟柳園桃忽爛漫黃鸝紫燕歡匹儔興來張口不能塞  
為君高歌南浦樓

歸舟遣興

蕭水章門三日路扁舟一歲頻來去去望南風來望北  
好風半日終難遇蹉跎萬事總逡巡且就江潭烹紫鱗

忽看兩岸花皆落細雨平蕪愁殺人

灌瓦研歌

李梅公司馬藏研五瓣如梅花質如黃玉間作紺碧  
色累累墳起云是灌嬰廟瓦請予為詩

范土千年化圭壁琢作梅花伴騷客膩質全堆金粟黃  
斑痕細奪琅玕碧主人置酒開山房叢花錦石兼幽篁  
摩娑畫畫亦無數出此四座生清光傳聞廟瓦今破碎  
銘字剝殘誰睹記扣之如磬拭如烟龍尾端溪盡堪棄

雩陽古廟野火焚穹碑斷礎皆寒雲神物可憐光怪在  
令人轉說灌將軍

臨江仲夏有懷荔枝之美因寄吳福州聖水劉都

使潤宗

臨江長夏真可憐熱如釜甑宵無眠冰漿雪藕那可得  
沉瓜浮李都茫然忽憶往年使粵嶺荔枝夾道垂江邊  
絳襦仙人日滿坐十年消渴為之捐又向端江尋石硯  
明舊沈朱歡見面

沈止岳  
朱子暇

沉水香中進羽觴荔枝園裏



開高宴傾盤旋摘連百顆驅童上樹將千遍就中黑葉

號無雙喚取水團良足羨

黑葉水團俱佳種

客云此種猶未奇

閩為第一蜀次之福郡人家千萬樹驛亭官舍子累累

陳紫江綠尤奇絕惜哉遙望空嗟咨故人今作福州守

為政風流無不有魁梧劉子氣如雲相過斗酒常殷懃

此時五月荔枝熟日啖三百還未足圖傳白傅絕形容

譜較君謨多品目

白香山有荔枝圖序  
蔡君謨作荔枝譜

二君倚樹定狂

呼曾否思予亂心曲寄聲為語陳使君

陳少參階六

遺民更

訪蘆中人

昔田余廣之先生自稱蘆中人

平生知己各天末孤城索處

徒酸辛東南烽火猶未息出門道路多荆榛安得憑虛

生羽翼一日飛騰周八垠

洪都吟寄熊雪堂少宰

洪都江水老蛟窟蒼虬赤龍畫出沒蓼洲先生興超忽  
獨卧洲頭抱明月干旌屢下尚高枕注目西山森窅兀  
畫船在檻書滿床吟罷丹鉛字如髮古人既死存者言  
精魂往往遭剔掘憐余癖好贈奇編許我身中有仙骨

江干繫艇數相尋  
高論微言不能歇  
吏部文章信起衰  
山公啟事多補闕  
扶桑搖落滄溟浚  
精衛銜山木石竭  
誰信臨流怯浩歌  
孤舟五月涼風發

莆田余希之注李長吉詩作歌寄之

嶧陽琴材野火燒  
海波晦冥烏悲號  
夜半騷魂塚中起  
玉樓使者寒不死  
石鼓初鳴桐木魚  
冰蠶重濯錦江水  
李生余生皆畸人  
知音識曲傷千春  
伯也能倡仲能和

伯氏廣之吏部詩近萬首

眼前樂事真絕倫  
吾愛昌黎有奇癖  
鷗鵬

垂翅能先識其時  
崛與拘金鐵一寸  
瑤草不肯食世人  
皮相韓無詩天孫  
怒罷機中絲請君  
並輯為韓李光怪  
應須纏十指

五嶽真形圖歌

丹砂所揭

五嶽足跡誰能徧  
五嶽真形誰所見  
岱宗山下岳祠東  
鐫瑤刻玉窮鬼工  
紫泥搗就珊瑚色  
高堂日射扶桑紅  
璇宮銀闕森髣髴  
羣仙玉女紛相從  
禹鼎沉淪多不若  
山林佩此百神却  
丹竈思尋勾漏砂  
靈巖定采天台藥

陟岳尋仙思漢武茂陵寂寞一抔土倘許吾曹有仙骨  
君現真形與君語

終風篇

摧山剗地千樹折三日震蕩吼金鐵捲起荒村屋上茅  
橫翻駭浪江頭雪比歲兵荒萬事非酸風鬼嘯重霑衣  
夏苗乾死秋穀稀一時化盡枯蓬飛

中秋夜愚樓觸月同赤方伯調阮懷耦長諸子

山寺歸來赤日落江心明月銜官閣清秋逸興共婆娑

畫棟朱闌倚寥廓屏風側疊環遠山素練平鋪臨巨壑  
閣前古木三十圍雲來天矯蒼龍飛菁蔥桂萼含金粟  
窈窕蓮花墜粉衣中宵羅袂如霜雪銀河倒瀉天地白  
烏鵲南飛見羽毛觥籌交錯忘主客兵荒萬事苦傷神  
良夜初傾竹葉春庾樓滕閣皆偶爾步兵中散伊何人  
去年此夕客蕪關今年此夕吟蕭灘漂泊浮生為一葉  
同心合坐千秋難千秋難在今夕羣彥聚東南高吟響  
金石作歌贈明月月亦解愛惜智愚計較何區區鯢鵬

斥鷃皆拘墟老夫今夕百愁無鑄金作樓良不愚君不見向平遊興在五嶽那能偃蹇跼蹐一寸地使我眼前一日無江湖

送耦長歸宣城

期君別在重陽後纔過中秋即分手暮雨寒凝閣阜雲朔風吹折蕭灘柳少年卓犖羞腐儒覽勝扁舟放五湖朝吟彭蠡夕滕閣大者琬琰小明珠春晴坐我竹亭下日見青山滿官舍藜牀枕藉盡風騷銀管丹黃窮午夜

分燈有客共聯吟韓孟高梅勢相亞

耦長與阮懷有湖西聯句

人皆

歎爾傾城姿愁絕娉婷猶未嫁相看青鬢易成絲百年

少壯能幾時千鈞強弩會須發陸殫虎豹水蛟螭愛爾

芙蓉艷朝日長歌為我散愁疾嗟嗟寸心兩不忘共采

春華佩秋實

浮山吟送藥公入青原山時為笑峰禪師掃塔

浮山一片雲飛落蒼梧野忽值南風吹旋歸廬嶽下

藥公

奉家浮山避地梧州華蓋寺值余使西粵始同歸抵匡廬別往還離合詎無因十年



舊事休重陳三生石上魂未斷長瓢來濯清江濱老禪  
不演三乘義却注南華窮象繫推倒輔嗣冢中骨笑看  
蒙叟人間世洮洮清辨渾無語食盡茶蓼覺蜜苦戲拈  
稊米是神仙捲起河源作飛雨坐中秋色何蒼蒼城頭  
絕巘森相望興來遣興揮秃筆淋漓墨跡紛滿床塔掃  
青原入山窟地作蒲團隨處歇黃荆倒插鬱菁蔥七祖開山  
時嘗倒挿黃荆至今尚茂又見孫枝爭秀發螺湖鷺浦夕陽曛吸盡  
西江獨有君別後思君何處所金牛泉畔夜鐘聞

藥公拈余浮雲一洗萬峯出作畫并題短歌見貽

依韻報謝

藥公別具神仙筆照夜青藜逢太乙手翻滄海弄白日  
興酣筆落如箭疾千巖萬壑何周悉為我倒縮蓬萊歸  
一室雲蒸霧合天地一半空風雨泉聲出

附藥地贈詩 愚山生就名山筆十洲五嶽供塗乙  
瑤石瓊林浴天日波浮霧合風馳疾我欲贊歎不能  
悉為畫子春島上絃歌室忽然  
潑墨得句一浮雲一洗萬峯出

送阮懷幼龍同歸里

楓葉初黃橘尚綠騷人並集芙蓉屋為舞白苧燒華燭  
傷心難聽驪歌曲昨接家書今日歸不恨別長恨別促  
吾儕放眼爭千古恥論窮達分虎鼠看君在困能倔强  
俯視青雲不足取結客飛揚年少場賣文為活中心傷  
半年官舍詩盈寸與古作者爭毫芒梅子淹留無一月  
病中詩思如冰雪剪燭連牀興未窮一時二妙皆離別  
霜摧木落風怒號移觴密坐淹今宵美人遲暮思公子  
君去誰知我鬱陶人生拂意無貴賤但得同心齊所願

伯勞西去燕飛東眼前憔悴君所見

寄贈徐山甫廣文

飲百斗談神仙古來惟有李青蓮廣文先生無乃是囊  
中自注參同篇惜哉杖頭無酒錢妻兒待米氣蕭索生  
徒餽餉猶堅却坐客無羶出無騎芒鞋布襪尋丘壑貧  
交苦愛蔡芹溪相過索飲醉如泥黃土可憐埋玉樹時蔡  
已雙相斗酒共誰携

甘林遊讌作

同徐伯調顧赤方  
黃坤吉陸在璞

瀟江水抱山城流奇樹青青金鳳洲我逢好友即開愁  
渡江野坐隨沙鷗沉沉翠幙暗天地離離萍實堆林丘  
黃衣仙人好顏色笑我多憂將白頭鹿皮藉草傾清醕  
揮杯急勸如風雨洲上木奴那作計橘中棋局今何許  
酒罷烟寒香在衣村醪重酌莫相違千秋不忘此今夕  
明月隨舟送客歸

得貽上揚州書却寄

時自白下至吳門並有遊記

漁洋山人海鶴姿一卷冰雪忘朝飢我懷君日君思我

千里同時各有詩  
楚江十月梅花早  
折寄躊躇嗟遠道  
素書珍重來章門  
美人託贈皆香草  
男兒作吏絕可憐  
登臨嘯咏誰能兼  
吳會山川好無數  
一時將去何不廉  
長風吹籜歲已晚  
愛君止願加餐飯  
報書却付廬山雲  
送到邦關勿辭遠

放歌答蘄州顧黃公

大風發地猛獸恐  
巴陵欲裂衡山動  
洞庭七澤橫天來  
魚龍百怪相喧喧  
黃公黃公太奇肆  
使我目眩失位置

繁絃雜調相錯鳴語笑無端還涕泗一代風流澹蕩人  
廿年烽火悲酸事君雖郢客生在吳顧曲追歡無事無  
頻過幕府為揖客時傍傾城眠酒壚流離滯跡秦公子  
詞賦傷心楚大夫倔强寧拋三尺組魁梧自愛千金軀  
扁舟忽繫蕭江岸兩月新詩不可算脫冠半醉作佯狂  
舉杯欲擲翻河漢眼中之人紛如蟻灑落如君復有幾  
開心剖意君不欺吾亦分明看爾詩兩雄相值漫相許  
浮名身後誰當知我昔過黃州飛騎登赤壁題詩破苔

蘇長嘯響霹靂荒榛敗瓦山鬼啼玉局仙人不可覓早  
知君卧北山阿悔不招尋吹鐵笛蹉跎晚相遇歲月行  
將暮摧殘困簿書愁疾闕章句疊韻重篇懶唱酬紫螯  
黃菊少歡聚顧黃公顧黃公紛紛馬上皆英雄金鞍玉  
勒橫珠弓吾曹腐唇誇繡虎諸侯磨盾嗤雕蟲君言老  
去知音急此語能令雙袖濕騶虞垂首緦踰驕枳棘爭  
榮蘭蕙泣空手無錢送爾歸秋燈夜雨百憂集及今相  
見且盡歡君過三十我四十



就亭望閣阜山雪

去年見雪始作亭雪殘洗出芙蓉青今日登亭初見雪  
倚天瓊樹森皎潔夕陽倒射天門開寒光燦爛金銀臺  
風吹萬疊晴雲出冉冉羣仙欲下來

李尚書夜宴燈舞歌

酒坐清光何陸離珊瑚火樹交葳蕤白紵杯盤安足希  
翩何翻覆華燈飛繞楹拂檻相因依低昂容與紛參差  
髮髯羣仙絳羅衣洋洋舞袖香風微繁絃逸響留春睥

歡樂既醉不能歸不能歸夜何其歌聲遲露將晞

就亭醉歌答李宗伯

芳洲如碧玉落花成錦茵綠波與奇樹蕩漾清江春  
倉庚聲裏天氣新葡萄酒酌謫仙人謫仙八十顏如童  
開口大笑生春風緋桃杜鵑獨晚發兩株正照金尊紅  
坐我芙蓉屋倚我篋簫亭樹裏丹樓紛翕葩城頭疊嶂來  
青冥謂余亭閣好無敵青山古樹尤難得古樹輪囷百  
歲餘青山迴薄萬古色天留勝事待吾儕會合登臨豈

人力管絃日暮重開宴嬌歌忽懷芙蓉面

公詩有我家  
失却芙蓉面

使君尚有  
芙蓉屋

洛浦明珠悵不還舞衫化作西飛燕歌欲闌

夜未央請君再進白玉觴風回花片入酒香壯心暮齒  
慨且慷吾獨何為生悲涼

### 人生歎

人生常懷千歲憂晝短應須秉燭遊古之作者已腸斷  
我今歌此仍淚流泰山為輕一羽重巢由尚笑唐堯愁  
達賢懷抱類如此萬事浮雲何足謀盜粟恥為太倉鼠

被繡誰憐清廟牛撚鬚苦吟復奚益坐遣霜雪盈我頭  
丈人卷古但安坐息心頤性長優游猶龍五千亦偶爾  
蒼蠅細響君且休

西江得蔣虎臣書言自吾宛陵入黃山却寄短歌  
有僧來自牛頭寺懷君一札千行字雙旌臘月宛陵遊  
素書重向洪川寄藥物攜將療我衰紫芝歌曲傷人意  
宛陵凋謝非昔時霜摧木落客心悲涇川難問琴高鯉  
疊嶂虛尋謝朓祠先生過我待歸閣

予在官時叔父構草閣曰待歸閣

寄

宿溪光忘寂寞報道山家雲月好苦愁拙宦風塵惡黃  
山之麓丹砂泉濯君仙骨凌紫烟十年舊約余獨慳夢  
魂飛上蓮花顛却如酒人聞旨酒口未得飲空流涎聞  
君黃山既久淹何時更掉潯陽船君不見匡嶽鑪峯碧  
烟裏橫空飛瀑天為洗遲君漱齒餐石髓

發表江

秀江空翠看欲無盤渦激瀨寒侵膚乘流縱棹迅飛鳧  
羣山却走如亡逋岬傍水碓喧轆轤釣臺巨石青珊瑚

河伯江妃白晝趨卧聞灘響忽已逾颯如勁箭離雕弧  
萬籟奔騰鳥獸呼枕藉清光離簿書藤花飄落上髭鬚  
逸興今朝不可孤舉杯滿酌酬江湖

樓頭歌呈太虛諸公時三月廿四日後三日立夏

太虛先生極言著書方  
法伯調弘載將歸越矣

陂陀尺寸皆芳草樓頭新綠忽已老坐中美人又將歸  
片時不醉朱顏槁平生意氣山可移中年學道悔何遲  
富貴神仙終兩誤千秋萬歲我為誰勞勞愁緒何時畢

過眼韶華爭箭疾枕藉糟丘未為失春光珍重餘三日

送張虎別大參

余分守湖西張為分  
巡時以裁併回籍

皎皎雙白鶴雙棲自相匹一朝羽翼分悲鳴聲唧唧  
唧終當別離腸無斷絕誦子詩如錦重我心如結蓼蟲  
習苦人謂甘君去艱辛向誰說湖西三郡皆瘡痍山連  
楚粵多嶮巖爾我犄角猶難治君去愁將一木支載書  
歸興何蕭爽山川到處延清賞累月曾眠西子湖三峯  
舊踏仙人掌愛君意氣輕華簪愛君流水操素琴十年

在匣今一鼓殷勤珍重憐知音相思江上樹江雲忽已  
暮惆悵春光好却共美人去白鷺洲前青雀舟簫灘望  
斷倚高樓相期斗酒難相值心逐長江千里流

建蘭歌

澧浦舊種人不識建陽厥產稱第一花高葉短自離羣  
嬋媛獨媚幽人室殷勤愛護資清歡燥濕寒暄良獨難  
參差玉立當風笑密密叢花滿石欄昔時花少覺花好  
今日花多任花老主人爛漫坐花前有酒何人共傾倒



九畹繁滋勿復論靈均既去誰招魂  
願君見采充君佩  
與君同心君莫棄

紫芝歌

臨江府城南有唐處士歐陽董讀書臺叢生瑞竹色  
爛如銀名瑞筠山余分守之三年忽產紫芝百餘本  
李宗伯明睿更名紫芝山為之記

歲之癸卯夏初吉石龍城南芝草出爛漫參差數十叢  
紛如紫雲曜赤日寺後亭陰半山滿盤枕車蓋狀非一

百年父老罕驚見十日窮搜猶未畢是時僧舍薔薇開  
藥公駐錫閭翁來

李人虛來伯別號閭翁

拄杖披榛睹靈物賦詩

大笑同裴衷更錫山名曰紫芝摘詞勒碣冠崔嵬此山  
舊為處士宅中林尚想讀書臺昔產瑞筠今神草寸壤  
作異胡為哉九莖連葉非難致甘泉涵德空矜異嘉禾

不書萇楚嗟忍拾山茵侈奇瑞陳顧周梅

陳士業顧亦方周宿來梅

耦長並有詩

皆健手後先作歌真好事我愛紫芝曲人呼紫

芝山白石青山無姓字江雲松月心常閒老夫齒落髻

已班胡為渙湏局曲風塵間五芝倘許斧子食會當餐  
英茹實使我光澤成朱顏

泰酒歌

有火酒老  
酒二種

西昌半月罷飲酒舉杯勸我但搖手衆醉那能甘獨醒  
昔稱歡伯今良友可憐火酒如寒泉一觴未進喉欲然  
身非即墨與燕敵火牛何用摧中堅再傾琥珀名老春  
沃我消渴瑩心神醇醪苦雜青梅味裂牙蜚鼻還愁人

太常故老有伯玉自矜家釀比醪醕


蕭太常士瑋家釀  
名酒見春浮園日

記  
安得就君乞一斛斯人不見傷局促客夜憂來不可  
當眼前况復荷花香祇應紀叟壚頭醉回首家園天一  
方

吉州九日登天華山

螺川夜雨朝日晴早霞正照千山明郭西走馬即丹嶂  
巖前把醞看孤城浩蕩風塵成老叟怕見青楓映疎柳  
孟嘉從事昔淹留落帽曾經此地否  
孟嘉嘗官此州賓僚雲物  
好無敵緩舞清歌陵絕壁東籬有菊未開花野寺何人

遠吹笛西江三度送重陽此度車輪轉客腸家園官舍  
皆離別且盡今朝住醉鄉



學餘堂詩集卷十八